

Na osnovu čl. 37. i 43. Zakona o državljanstvu Bosne i Hercegovine ("Službeni glasnik BiH", broj 13/99), ministar civilnih poslova i komunikacija BiH, izdaje

UPUTSTVO

O NAKNADNOM UPISU U MATIČNU KNJIGU ROĐENIH KOJI SU STEKLI DRŽAVLJANSTVO R BiH U SKLADU SA ZAKONOM O DRŽAVLJANSTVU REPUBLIKE BOSNE I HERCEGOVINE

Član 1.

Uputstvom o naknadnom upisu u matičnu knjigu rođenih koji su stekli državljanstvo R BiH (u daljem tekstu: Uputstvo) utvrđuje se način i postupak naknadnog upisa u matičnu knjigu rođenih lica koja trenutno nisu upisana u matičnu knjigu rođenih, a koja su stekla državljanstvo Republike BiH u skladu sa Zakonom o državljanstvu R BiH ("Službeni list R BiH", br. 18/92, 11/93, 27/93, 13/94, 15/94, 26/96 i 30/96) (u daljem tekstu: Zakon o državljanstvu R BiH), i to:

- porijeklom,
- rođenjem na teritoriji BiH,
- naturalizacijom i
- po sili zakona člana 30. Zakona o državljanstvu R BiH ("Službeni list R BiH", broj 30/96).

Uputstvom se utvrđuje i obrazac zahtjeva za naknadni upis, koji čini sastavni dio ovog uputstva.

Član 2.

Uz zahtjev za naknadni upis lica koje je steklo državljanstvo R BiH porijeklom ili rođenjem na teritoriji BiH dužno je priložiti potvrdu kojom dokazuje da ispunjava uslove za sticanje državljanstva R BiH porijeklom ili rođenjem na teritoriji BiH, u skladu sa Zakonom o državljanstvu R BiH.

Uz zahtjev za naknadni upis lica koje je steklo državljanstvo putem naturalizacije dužno je priložiti dokaz o identitetu i rješenje o sticanju državljanstva R BiH putem naturalizacije na osnovu Zakona o državljanstvu R BiH.

Raniji državljani SFRJ koji su stekli državljanstvo R BiH lege po osnovu prebivališta u BiH u skladu sa članom 30. Zakona o državljanstvu R BiH dužni su priložiti uz zahtjev za naknadni upis dokaz o identitetu, dokaz o državljanstvu SFRJ i ispravu kojom dokazuju prebivalište u

Republici Bosni i Hercegovini na dan 6. aprila 1992. godine izdatu od strane nadležnog općinskog organa unutrašnjih poslova na osnovu evidencije o prebivalištu građana Bosne i Hercegovine.

Kao dokaz o državljanstvu SFRJ može se valjano utvrditi na osnovu slijedećih dokaza:

- uvjerenje o državljanstvu,
- pasoš,
- lična karta,
- vojna knjižica,
- brodarska knjižica.

Na osnovu slijedećih dokaza može se valjano pretpostaviti državljanstvo SFRJ i to:

- vozačka dozvola,
- radna knjižica,
- rodni list,
- zdravstvena knjižica,
- drugi dokumenti izdati od nadležnih organa.

U slučaju da isprava kojom se dokazuje prebivalište u Republici Bosni i Hercegovini na dan 6. aprila 1992. godine nije dostupna ili je nije moguće pribaviti u razumnom roku, podnosiocu zahtjeva za naknadni upis omogućuje se da tu činjenicu dokaže drugim sredstvima uključujući davanje izjava od strane tih lica i svjedoka, kod organa nadležnih za vođenje evidencije prebivališta.

Član 3.

Zahtjev za naknadni upis koji podnosi lice u BiH podnosi se neposredno nadležnom općinskom organu prema prebivalištu podnosioca zahtjeva.

Zahtjev iz inostranstva podnosi se putem diplomatsko ili konzularnog predstavništva u inostranstvu ili putem pošte nadležnom općinskom organu prema posljednjem prebivalištu ili boravištu podnosioca zahtjeva. Ako podnosilac zahtjeva nije imao boravište, zahtjev se podnosi prema posljednjem prebivalištu roditelja podnosioca zahtjeva.

Ako nema posljednjeg prebivališta predviđenog u stavu 2. ovog člana, zahtjev se podnosi MCPK-u.

Član 4.

O zahtjevima za naknadni upis koje podnesu lica iz člana 3. stav 1. i člana 3. stav 2. odlučuje nadležni općinski organ uz saglasnost MCPK-a.

Nadležni općinski organ sastavlja nacrt rješenja i zajedno sa zahtjevom i pratećom dokumentacijom dostavlja ga MCPK-u.

U roku od 30 dana nakon podnošenja zahtjeva MCPK-u, MCPK daje saglasnost na nacrt rješenja ili je uskraćuje. Ako se saglasnost uskraćuje, razlozi se moraju navesti u pisanom obliku. U slučaju da se MCPK ne oglasi povodom predloženog rješenja u roku od 30 dana, podrazumijeva se da je MCPK saglasan sa nacrtom rješenja.

Rješenje kojim se odobrava zahtjev je konačno nakon što MCPK da svoju saglasnost i rješenje se dostavi podnosiocu zahtjeva.

Ako MCPK uskrati saglasnost, nadležni općinski organ donosi rješenje kojim odbija zahtjev. Rješenje kojim se odbija zahtjev mora sadržavati razloge u pisanom obliku. Takvo rješenje je konačno kada se dostavi podnosiocu zahtjeva.

Član 5.

U slučajevima kada dokumentovani podaci koji se odnose na državljanstvo nisu dostupni ili ih državljanin ne može pribaviti u razumnom vremenskom roku, podnosiocu se dozvoljava da ove podatke obezbijedi drugim sredstvima, uključujući izjave koje daju takva lica ili druga lica u njihovu korist.

Član 6.

O zahtjevima za naknadni upis koje podnesu lica iz člana 3. stav 3. odlučuje MCPK. MCPK donosi rješenje o zahtjevu u roku od 30 dana nakon podnošenja zahtjeva MCPK-u. Rješenje je konačno kada se dostavi podnosiocu zahtjeva. Ako MCPK zahtjev odbije, rješenje o odbijanju mora sadržavati razlog u pisanom obliku.

Član 7.

Prilikom vršenja naknadnog upisa državljanina BiH koji imaju prebivalište u BiH, takvi državljani se upisuju u mjestu prebivališta.

Prilikom vršenja naknadnog upisa državljanina BiH koji žive u inostranstvu i koji nemaju prebivalište u BiH, takvi državljani se upisuju u mjestu u kojem su imali posljednje prebivalište u BiH. Ako takvog posljednjeg prebivališta nema, to lice se upisuje u mjestu u kojem su njegovi roditelji imali posljednje prebivalište u BiH.

Ako nema prebivališta iz stava 2. ovog člana, MCPK vrši naknadni upis u MCPK-u.

Član 8.

Za naknadni upis neće se postavljati drugi uslovi osim onih koji se propisuju ovim uputstvom.

Podnosilac zahtjeva ima pravo da pred nadležnim organima zatraži zaštitu u slučaju da nije zadovoljan rješenjem koje se donosi prema ovom uputstvu.

Član 9.

Ministarstvo civilnih poslova i komunikacija vrši nadzor nad primjenom ovog uputstva.

Član 10.

Uputstvo stupa na snagu danom objavljivanja u "Službenom glasniku BiH" i objavit će se u službenim glasilima entiteta.

Broj 01/1-762/00 3. oktobra 2000. godine Sarajevo

Ministar mr. Tihomir Gligorić, s.r.

[SLIKA 1.](#)